

ጳውሎስ ዲዎቲዮሳስ ፃፊዳ ናሞዓንሶ ኪታ ጋሳ ቆፋ

ጳውሎስ ዲዎቲዮሳስ ፃፊዳ ናሞዓንሶ ኪታይ፡ ጳውሎሳራ ኢሲፌ ኦፊሴሳኔ ጳውሎሳ ማታን ማዲያ ናባቴላ ዲዎቲዮሳ ዘሪዳ ዘሪያ ኦይኪስ፡ ሄ ዘሪያ ኦይፌ ቆፋይ፡ «ጌንጫን ሚናናው ቤሱስ» ጌይሳ፡ ዲዎቲዮሳ ዘሬኔ ሚንጮሶ ቃላ ኤኪዳይ፡ ዬሱስ ኪሪስቶሳባ ቱማ ማርካታና ሜላ ዋንጌላ ቃላኔ ጋላባ ጫቆ ቲሚርቲያ ሚንሱዲ ኦይካና ሜላኔ ሜቶይኔ ኢያይ ዳሪኮካ ታማርሶኒኔ ዋንጌላ ሳባኩን ሚናና ሜላሳ፡፡

ዲዎቲዮሳ ሃዳ ኤያቴላ ፓላማፔ ሃካና ሜላ ዲማ ሚኖ ዘሪይ ኢያው ኢሜቲስ፡ ሄሳ ሜላ ኦዳይ ኣሳ ቆይሱሲፔ ኣቲን ኣይኮካ ማዳና፡፡

ሄ ኡባን ዲዎቲዮሳ ኣኬካናው ቤሲያባይ፡ ጳውሎሳ ሃናታኔ ኢያ ዲሳ ቆፋ ሄሲካ፡ ኢያ ኣማኑዋ፡ ኢያ ጌንጫ፡ ኢያ ሰቁዋ፡ ኢያ ደንዳዒ ኢያ ጋኪዳ ሜቱዋ ለሚሶ ኦሱዲ ካላናይሳ፡፡ ጳውሎስ ሃ ኪታ ፃፊዳይ፡ ኢ ባ ዋሳ ኦንጊዲ ሃይቆስ ጊጌቲዳ ዋዳና፡፡

2 ዲዎቲዮሳ ኪታ ኣይፌ ቆፋታ

ጌሎ ቆፋ 1:1-2

ዲዎቲዮሳስ ኢሜቲዳ ዘሪያ 1:3-2:13

ዉርሴላ ዋዲያባ 2:14-4:5

ጳውሎስ ሃኒዲ ዳዒያ ዲሳ 4:6-18

ኩሻ ቆፋ 4:19-22

1 ያሳ ሸኔን፡ ዬሱስ ኪሪስቶሳን ቤንቲዳ ዳዖ ኡፋይሳ ማርካታናው ዬሱስ ኪሪስቶሳ ሃዋሬ ጊዲዳ ጳውሎሳፔ፡ 2 ታ ደሲያ ናባ ዲዎቲዮሳስ ኪቲቲዳ ኪታ፡፡

ያሳ ኣዋፔኔ ኑ ጎዳ ኪሪስቶስ ዬሱሳፔ ኣጼ ኬሃቴላይ፡ ማርቴላይኔ ሳርቴላይ ኔው ጊድ፡፡

ዲዎቲዮሳስ ኢሜቲዳ ዘሪያ

3 ታኒ፡ ታ ዋሳን ቃማኔ ጋላስ ኔና ቆፓይስ፡ ታኒ ዋሲያ ዋዳ ታ ማይዛታ ያሳኔ ታኒ ሎዖ ካሃን ሃጋዚያ ያሳ ኔ ጊሾ ጋላታይስ፡፡

4 ታኒ ኔ ኣፋላ ቆፓይስ፤ ኔና ቤዓዳ ኡፋይታናው ዳር ላሞታይስ፡፡

5 ቃሲ ኔው ዳዒያ ቱማ አማኑዋ ኤራይስ። ሄ አማኖይ ቤኒ ኔ ዋጋ አዬ ሎይዲኒኔ ኔ አዬ ኤወኒቂን ዳዒያ አማኑዋ ማለ።
 6 ሄሳ ጊሾ፣ ታኒ ታ ኩሺያ ኔ ቦላ ዋሊዳ ዋዴ ያሳይ ኔው ኢሚዳ ኢሞታ ኔኒ ዛራ ኤላና ማለ አኬኪሳይስ። 7 አይስ ጊኮ፣ ያሳይ ኑስ ዋልቃ፣ ሲቆኔ ኑ ሁዔ ሃሪያ አያና ኢሚሰፔ አቲን ያሻ አያና ኢሚቤና።

8 ሂዛ፣ ኑ ጎዳስ ማርካታናው ዬላቶፓ፤ ቃሲ ኢያ ጊሾ ቃሽቲዳ ታናንካ ዬላቶፓ። ሺን ያሳይ ኔው ኢሚያ ዋልቃን ዋንጌላ ጊሾ ታራ ሜቶ ኤካ። 9 ያሳይ ባ ሸኔኒኔ ባ አቶ ኬሃቴላን ኑና አሺዲ፣ ባ ጌሻ ዴሬ ኦላናው ኑና ዶሪሰፔ አቲን ኑኒ አሊዳ ኦሱዋ ጊሾ ጊዴና። ሃ አቶ ኬሃቴላ ኪሪሰቶስ ዬሱሳ ባጋራ አላሜይ ሜዴታናፔ ሲገሌ ኑስ ኢሚስ። 10 ሃዒ ሃ አቶ ኬሃቴላይ ኑና አሺያ ኪሪሰቶስ ዬሱሳ ዩሳን ቆንጨሰ። ኢ ሃይቆ ዋልቃ ጳይሲዲ፣ ዋንጌላ ባጋራ ጳዮና ዴዖ ኑስ ቆንጨሲሰ።

11 ታኒ ዋንጌላ ሳባኬ፣ ሃዋሬኔ አስታማሪ ጊዳና ማለ ያሳይ ታና ዶሪስ። 12 ታኒ ሄሳ ጊሾ ሃ ሜቱዋ ኤካይስ፤ ሺን ታ አማኔይ ኦኔኮ ኤሪያ ጊሾ ዬላቲኬ። ታው ኢሜቲዳ ሃዳራ ሄ ጋላሳይ ጋካናው ኢ ናጋናው ዳንዳዔይሳ ኤራይስ።

13 ታኒ ኔና ታማርሲዳ ቱማ ቃላ ለሚሶ ኦላ ኦይካዳ ኪሪሰቶስ ዬሱሳ ባጋራ ኑባ ጊዲዳ አማኑዋኒኔ ሰቁዋን ዴዓ። 14 ኑ ጊደን ዳዒያ ጌሻ አያና ዋልቃን ኔው ኢሜቲዳ ሎዖ ሃዳራ ናጋ።

15 ኢሲያ ቢታን ዳዒያ ኡባይ ታፔ ሃኪዳይሳ ኤራሳ፤ ኤንታ ጊደን ፊጌሉሲኔ ሄርሞጌኔሲ ዴዖሶና።

16 አኔሰፎሪ ታና ዳር ዋዴ ሚንሌሊዳ ጊሾ ጎዳይ ኢያ ሶ አሳስ ቃዴቶ። ታኒ ቃሾ ኬላን ዳዒያ ዋዴ ኢ ታናን ዬላቲቤና።
 17 ሄሳ ቦላ ኢ ሮሜ ካታማ ዪዳ ዋዴ ታና ሚንሊ ኮዪዲ ዳሚስ።
 18 ወርሴላ ጋላሳን ጎዳይ ኢያው ቃዴታና ማለ ታኒ ጎዳ ዋሳይስ። ኤፌሶና ካታማን ኢ ታና አይ ማለ ማዲዳኮ ኑ ሎይላ ኤራሳ።

2

ዬሱስ ኪሪሰቶሳን ሚና

1 ሂዛ፣ ታ ናናው፣ ኪሪሰቶስ ዬሱሳን ዳዒያ ማርቲላን ሚና።
 2 ዳር ማርካታ ሲገላን ታኒ ኔና ታማርሲዳ ቲሚርቲያ፣ ሃራታ ታማርሳናው ዳንዳዒያ አማኔቲዳ አሳስ ሃዳራ ኢማ።
 3 ዬሱስ ኪሪሰቶሳን አማንሌያ ዋታዳሬ ጊዳዳ ታራ ሜቶ ኤካ። 4 ኦላ ዋታዳሬይ ባ ሃላቃ ኡፋይሳናው ጊጌቲሲፔ አቲን

ሃራ አሶን ባና ፔሽና። 5 ሄሳዳካ፣ ጋዴ ዋዒያ ኦኒካ ቤሲያ ኦጌራ ጋዴቶና ኢዲኮ ዋይቶ ኤኬና። 6 ጎሻን ዳቡሪያ ጎሻንቸይ ባ ዳቡራ ኣይፊያፔ ሚያ ኮይሮ ኣሲ ጊዳናው ቤሴሰ። 7 ኔ ኣኬካና ማላ ጎዳይ ኔና ማዳና ጊሾ ታ ኔው ኦዲዳባ ኔ ዋዛናን ና።

8 ታኒ ማርካቲያ ዋንጌላ ማላ ሃይቆፔ ዳንዲዳ፣ ዳዊቲ ዜሬሌ ጊዲዳ ዩሱስ ኪሪስቶሳ ቆፓ። 9 ታኒ ዋንጌላ ኦዲያ ጊሾ ኢታባ ኦሊዳ ኣሳዳ፣ ቃሼታዳ ሜቶ ኤካሰ። ሺን ያሳ ቃላይ ቃሼቲና። 10 ሄሳ ጊሾ፣ ያሳይ ዶሪዳ ኣሳቲ ኪሪስቶስ ዩሱሳን ዳዒያ ኣቶቴላ ማሪና ቦንቹዋራ ኤካና ማላ ኤንታ ጊሾ ኡባባን ዋይታይሰ።

11 ሃይሳዳ ያጊያ ቱማ ቃሊ ዳዔስ፤

«ኑኒ ኢያራ ሃይቂዳባ ጊዲኮ፣
ኢያራ ኢሲፌ ዳዓና።

12 ኑኒ ጌንጨኮ፣
ኢያራ ኢሲፌ ካዎታና።

ኑኒ ኢያ ካዲኮ፣
ኢ ኑና ካዳና።

13 ኑኒ ኣማኔቶና ኢዲኮ፣
ኢ ኣማኔቲዳይሳ ጊዲዲ ዳና።

ኣይሰ ጊኮ፣ ኢ ባና
ካዳናው ዳንዳዔና» ያጌሰ።

ሚኖ ኦሳንቸ

14 ኔኒ ኤንታ ሃይሳ ኣኬኪሳ፤ ኤንቲ ቃላታ ጋሶን ፓላሞና ማላ፣ ጎዳ ሲንፋን ኤንታ ዘራ። ሄሲ ሲዔይሳታ ቋይሴሲፔ ኣቲን ኣይኮካ ማዳና። 15 ኔኒ ቱማ ቃላ ሱሬቲላን ታማርሴይሳኔ ዩላዮና ኦሳንቸ ጊዲዳ፣ ያሳይ ናሺያ ኣሳዳ፣ ኔናቴላ ኢያው ኢማናው ሚና። 16 ሺን ሃ ኣላሚያስ ኢንጃቲያ ጎዖና ኦዳፔ ባቃታ። ሄሳ ማላ ኦዳይ ኣሴ ያሳፌ ሃሴሰ። 17 ሄሳ ማላ ኦዳይ ኣሳቴሌ ሚዲጊያ ፓዖና ዋይዛዚሬ ማዲንፋ ማላ። ሄሳ ማላ ኦዳ ኦዳቴይሳታ ጊዲፌ ሄሚኖሶሴ ፊሊዮሲ ዳዖሶና። 18 ሃ ኣሳቲ ቱማ ኦጊያ ኣጊዲ፣ «ሃይቂዳ ኣሳይ ሃይቆፔ ቤኒ ዳንዲዳሶና» ያጊዲ ጉላ ኣሳታ ኣማኑዋ ቋይሲዳሶና።

19 ጊደሺን፣ ያሳይ ሚኖ ዘላ ሃዒዳ ጊሾ ቃፃናው ዳንዳዔና። ኢያ ቦላ፣ «ጎዳይ ባይሳታ ኤሬሰ። ጎዳ ሱንፋ ዌጊያ ኦኒካ ኢታ ኦሶፔ ሃኮ» ያጊያ ቃላይ ዓፌቲሰ።

20 ኢሲ ጊታ ከላን ዋርቃፌ ዋይኮ ቢራፔ ኦሴቲዳ ሚሼታ ፃላላ ጊደናሺን ሚላፌ ዋይኮ ኡርቃፌ ኦሴቲዳ ሚሼቲካ ዳዖሶና። ሄሳታፔ ባጋቲ ቦንቾ ኦሶስ፣ ቃሲ ባጋቲ ቶሼቲያ ኦሶስ ፔዖሶና።

21 ሄሳ ጊሾ፣ ኦኒካ ኢታ ኡባ ኣጊኮኔ ባና ጌሺኮ፣ ቦንቾ ኦሶ ኦሊያ ሚሼ ጊዳና። ኤንታ ዴዖይ ጌሺኔ ጎዳ ኡፋይሲያባ፣ ቃሲ ኤንቲ ሎዖ ኦሶ ኡባ ኦላናው ዳንዳዔይሳታ ጊዳና።

22 ናዓቴላ ኢታ ኣሙዋፔ ባቃታ። ጌሻ ዋዛናን ጎዳ ያጊያ ኣሳታራ ኢሲፌ፣ ዲሎቴላ፣ ኣማኑዋ፣ ሲቆኔ ሳሮቴላ ካላ።

23 ሺን ኦሺ ሜዴይሳ ኤራዳ ኤያቴላኔ ሃዳ ጊዲዳ ፓላማፔ ሃካ። 24 ጎዳ ኦሳንቾይ ኣሳ ኡባሰ ኬሃ፣ ሎዖ ታማርሴይሳኔ ዳንዳዓንቾ ጊዳናው ቤሴሲፔ ኣቲን ኦይታናው ቤሴና። 25 ኢ ባራ ኤቄቲይሳታ ኣሽኩቴላን ሴሬይሳ ጊዳናው ቤሴሰ። ኤንቲ ባንታ ናጋራፔ ሰሚዲ ቱማ ኤራናዳ ያሳይ ኦላኔኮ ኦኒ ኤሬ። 26 ኤንቲ ባንታ ዋዛናኮ ሰሚዲ ባ ሼኒያ ኦላና ሜላ ኤንታ ኦይኪዳ ፃላሄ ዪሂያፔ ኬሲ ኤካና።

3

ወርሴላ ጋላሳ ማላታታ

1 ወርሴላ ጋላሳን ኡንዔሊያ ዋዳይ ያናይሳ ኤራ። 2 ኣሳይ ባንታና ዶሴይሳታ፣ ሚሼ ሲቄይሳታ፣ ጩቄቲይሳታ፣ ኦቶሬይሳታ፣ ጫዬይሳታ፣ ባንታና ዩሊዳይሳታሰ ከቴቶናይሰታ፣ ጋላቶናይሰታ፣ ጌሻቴላ ባይናይሳታ፣ 3 ሲቆይ ባይናይሳታ፣ ማሮቴላ ኤርናይሳታ፣ ዘጊሬይሳታ፣ ባንታና ሃሮናይሳታ፣ ቃዴይ ባይናይሳታ፣ ሎዖ ደሶናይሳታ፣ 4 ሞርኬስ ኣሊ ኢሜይሳታ፣ ቆሬ ባይናይሳታ፣ ኦቶሮን ሱጌቲይሳታ፣ ያሳፌ ኣሊዲ ኣሾ ኡፋይሳናው ደሴይሳታ ጊዳና። 5 ኤንቲ ኣማኒያ ዳናሶናፔ ኣቲን ኣማኖ ዋልቃ ካደሶና፤ ኔኒ ሄሳ ሜላ ኣሳታፔ ባቃታ።

6 ኤንታፌ ኢሶቲ ኢሶቲ ኣሳ ከላ ጌሊዲ ናጋራን ኦይከቲዳይሳታኔ ዲማ ዲማ ኣሞን ሱጌቲያ ዳቡራንቾ ማጫሳታ ቦላ ጎዳቶሶና። 7 ሄ ማጫሳቲ ኡባ ዋዳ ታማርሶና፣ ሺን ቱማ ኤራናው ዳንዳዖኮና። 8 ያኔሲኔ ያምባሬሲ ሙሴራ ኤቄቲዳይሳዳ ሃ ኣሳቲ ጉጌይ ኦላናይሳታኔ ኣማኖን ኩንዲዳ ኣሳታ ጊዲያ ጊሾ ቱማራ ኤቄቶሶና። 9 ሺን ያኔሳኔ ያምባሬሳ ኤያቴላይ ቆንጩዳይሳዳ ኤንታ ኤያቴላይካ ኣሳ ኡባ ሲንላን ቆንጫና ጊሾ ኤንታው ሃኒና።

ወርሴላ ዘሬ

10 ሺን ኔኒ ታ ቲሚርቲያ፡ ታ ዲሳ፡ ታ ቆፋ፡ ታ አማኑዋ፡ ታ ዳንዳዓ፡ ታ ሲቁዋ፡ ታ ጌንጫ፡ 11 ታ ዩዴቴላኔ ታ ሜቱዋ ኤራሳ፡ አንጾኪያን፡ አቆኒዮኔን፡ ሊሰፂራ ካታማታን ታና ጋኪዳባኔ ታኒ ዳንዳዒዳ ሜቱዋ ኤራሳ፤ ጎዳይ ታና ሄ ኡባፌ አሺሰ።

12 ኪሪሰቶስ ዩሱሳን ያሳ ኡፋይሲያ ዴዎ ዳናው ኮያ ኡባይ ጎዴታና። 13 ኢታ አሳቲኔ ባሌሌይሳቲ ባንታው ባሌቲሼኔ ሃራታ ባሌሊሽ ካሴፔ አቲ አቲ ባና።

14 ሺን ኔ ታማሪዳ ቱማኒኔ ኔ አማኒዳ አማኑዋን ኤቃ። ኔ ኦዴሬ ታማሪዳኮ ኤራሳ። 15 ኔኒ ኔ ናዓቴላፌ ደማዳ ኪሪሰቶስ ዩሱሳ አማናዳ አቶቴሌ ዴሚያ ጨንጫቴሌ አማናው ዳንዳዒያ ጌሻ ማፃፋታ ኤራዳሳ። 16 ጌሻ ማፃፋ ኡባይ ያሳፌ አሜቲዳ ቃላ። ሄ ማፃፋይ ቱማ ታማርሳናው፡ ባሊዳይሳታ ሴራናው፡ ሱሪሳናውኔ ፂሎቴላ ዲሳስ ኮሺያ ዘሬ አማናው ማዴሰ። 17 ያሳ አሲ ፖሎኔ ሎዎ ኦሶ ኡባ ኦላናው ጊጊዳይሳ ጊዳና ሚላ ማዴሰ።

4

1 ታኒ ኔና ያሳ ሲንላኒኔ፡ ካዎ ጊዲዲ ሃራናው ቆንጨያ ዎዴ ፓፃታኔ ሃይቁዳይሳታ ፐርዳናው ዴዒያ ኪሪሰቶስ ዩሱሳ ሲንላን ዘራይሰ። 2 ቃላ ኦዳ፤ ዎዴይ አንጃቲን አንጃቶና አዲን ሚናዳ ኦዳ። ዳር ዳንዳዒኒኔ ታማርሰን አሳ ዘራ፡ ሴራኔ ዴንፌላ። 3 አሳይ ቱማ ቲሚርቲያ ሲያና አዲያ ዎዴይ ያና። ኤንቲ ባንታ አሙዋ ካሊዲ፡ ባንታው ሲዓናው ኡፋይሲያባ ኦዲያ አስታማሬታ ሺሾሶና። 4 ኤንቲ ቱማ ቲሚርቲያ አጊዲ፡ ቱማ ጊደና ኦዳ ሲዓናው ባንታ ሃይላ ዛርሶና። 5 ሺን ኔኒ ኡባባን ኔና ሃራ። ሜቱዋ ዳንዳዓ። ዎንጌላ ማርካቴላ ኦሱዋ ኦላ። ኔው አሜቲዳ ያሳ ኦሶ ኡባ ፖላ።

6 ታኒ ያርሺቲያ ዎዴይ ጋኪሰ፤ ሃ አላሚያ አጋዳ ቢያ ዎዴይ ማቲሰ። 7 ታኒ ሎዎ ኦላ ኦሌታሰ፤ ታ ጋዲያ ዎፃዳ ወርሳሰ፤ አማኑዋ ናጋሰ። 8 ሲንላፌ ፂሎቴላ ካላቻይ * ታና ናጌሰ። ሄሳ ፂሎ ፐርዳ ፐርዲያ ጎዳይ ሄ ጋላሰ ታው አማና። ሄሳ ታ ፃላላሰ ጊደናሺን ኢያ ቆንጨኛ አሞቲያ ኡባሰ አማና።

ጳውሎሳ ቡዞ ቆፋታ

3:11 ሃ.አ 13:14-52፤ 14:1-20 * 4:8 ፂሎቴላ ካላቻይ፡ ፂሎቴላ ዴዎ ጊሾ ታ ኤካና ካላቻ። ፂሎቴላ ታው ካላቻ ኦሊዲ አሜሰ ጉሱ።

9 ኤሌሳ ያዳ ታና ቤዓ። 10 ዳማሲ ሃ አላሚያን ዳዒያባታ ደሲዲ፣ ታና አገዲ፣ ቴሴሎንቄ ካታማ ቢስ። ቁርቁሲ ጋላቲያ ቢታ፣ ቃሲ ቲቶይ ዲልማዒያ ቢታ ቢስ። 11 ሉቃሳ ፃላሊ ታራ ዳዒስ። ማርቆሲ ያሳ ኦሶን ታና ማዳናው ዳንዳዒያ ጊሾ ኔራ ኤካዳ ያ። 12 ታኒ ቲኪቆሳ ኤፌሶና ካታማ ኪታስ። 13 ኔኒ ያሾ፣ ዒሮዳዳ ካታማን ካርፖሳ ማታን አጋዳ ዪዳ ታ ኮቲያኔ ማፃፋታ ታው ኤካዳ ያ። ኡባካ ጋልባን ፃፊቲዳ ማፃፋታ ኤኮና ዮፓ።

14 ቢራታ ቆዒያ ኢስኪንዲሬይ ታና ዳሮ ቆሂስ፤ ጎዳይ ኢያ ኦሱዋዳ ኢያው ዛራና። 15 ኢ ኑ ቲሚርቲያ ዳሮ ኢዒያ ጊሾ ኢያፔ ኔና ናጋ።

16 ኮይሮ ታ ሞቴቲያ ዎዴ ኡባይ አገዲ ቢደሶናፔ አቲን ኦኒካ ታና ማዲቤና። ያሳይ ሄ ባላ ኤንታው ታይቦፖ። 17 ሺን ታኒ ኩሜላ ኪታ አይሁዴ ጊዶና አሳ ኡባስ ማርካቲን፣ ኤንቲ ሰዓና ሜላ ጎዳይ ታ ማታን ኤቁዲ ታው ዎልቃ አሚስ። ቃሲ ኮሻቲዳ ጋዎዳ ዶና ዶዪዳ ሃይቁዋፔ ታና አሺስ። 18 ጎዳይ ታና ኢታ ኡባሬ አሺዲ ባ ሳሎ ካዎቴላ ሳሮን ኤፋና። ኢያው ሜሪናፔ ሜሪና ጋካናው ቦንቾይ ጊዶ። አሚንዒ።

ወርሴላ ሳሮላ

19 ጲሪስቁላስ፣ አቁላስኔ አኔሰፎራ ሶ አሳስ ታ ሳሮሉዋ ኦዳ። 20 ኤራስዖሲ ቆሮንቶሳ ካታማን አቲስ። ዒሮፊሞሲ ሃርጌቲዳ ጊሾ ሚሊጄ ካታማን አጋስ። 21 ባልጎይ ጌላናፔ ሲንጤ ኤሌሳዳ ያ።

ኤዉቡሉሲ፣ ጲዳሲ፣ ሊኑሲ፣ ቁላዳይኔ ሃራ አማኒያ አሳቲ ኡባይ ኔና ሳሮ ሳሮ ጎሶና።

22 ጎዳይ ዩሱስ ኪሪስቶሲ ኔ አያናራ ጊዶ። ያሳ ማርቴላይ ሂንቴ ኡባራ ጊዶ።

4:10 ቆላ 4:14፤ ፊልሞ 24፤ 2ቆሮ 8:23፤ ጋላ 2:3፤ ቲቶ 1:4 4:11 ቆላ 4:14፤ ፊልሞ 24፤ ሃ.ኦ 12:12፣ 25፤ 13:13፤ 15:37-39፤ ቆላ 4:10 4:12 ሃ.ኦ 20:4፤ ኤፌ 6:21-22፤ ቆላ 4:7-8 4:14 1ዒሞ 1:20፤ ማገከ 62:12፤ ሮሜ 2:6 4:19 ሃ.ኦ 18:2፤ 2ዒሞ 1:16-17 4:20 ሃ.ኦ 19:22፤ ሮሜ 16:23፤ ሃ.ኦ 20:4፤ 21:29

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022

c35d6c73-3843-5482-b53e-7559d35deee5